

Seminari da minoritads: Rimnar e trenar cumpetenzas

DA FLAVIA HOBI

■ Davent dals 16 fin ils 21-2-2016 han enturn 30 juvenils profità da la schanza da pudair visitar il «kick-off» seminari «opening doors» da la YEN (Youth of European Nationalities) a Belgrad, la chapitala da Serbia. Organisà quest eveniment ha la minoritad dals Serbs-aromanians, numnads Cincar, cun lur organisaziun «Lunjina». Las finamiras dals quatter dis da lavur era da rimnar cumpetenzas per animar la giuventetgna da sa participar. Pli exact vul quai dir da sviluppar qualificaziuns sco per exempel tras comunicar, motivar u la lavur en gruppa. Vinavant munta quai era da pudair manar discussiuns publicas e sustegnair process da decisiuns; betg d'emblidar dad esser capabels da prender inziativa. Trenà avain nus questas qualificaziuns tras modas sco «forum theatre», pensums che stevan en contact cun indigens u lavur cun social media sco «blogging» (scriver blogs) respectivamente «vlogging» (far films). Quests lavuratori variants èn vegnì creads e manads da differents trenaders professiunals.

Ma sper la lavur avain nus er emprendì bler davart ils Cincar, lur societad en Serbia, la istorgia e cultura. Tranter auter avain nus visità il museum da Nikola Tesla, igl inventader, fisicher ed electroinschigner da renum mundial. Spezial da menziunar è segir era la gronda ospitalitad dals Cincar durant la «vlach-night» nua ch'els han legì e chantà en lur lingua e plinavant preparà bieras specialitads culinarias. Da questas dad autras minoritads avain nus gia pudì degustar il di avant durant la saira interculturala. Quai vul dir preschentaziuns da maglia e bavronda sco per exempel dals Slowens u Croats en l'Austria, dals Tudestgs en Russia u dals Frislandais per be numnar in pèr da las minoritads sa participadas. Persuenter avain nus Rumantschs fatg enconuscent la turta da nuschs, paun cun paira, chaschiel d'alp u rosoli. Latiers han ins era pudì tadlar differenta musica ed emprender in u l'auter saut indigen. Durant il temp li-

ber u las tschaveras han ins profità da discurs interessants cun las autras minoritads che avriavan novs sguards e perspectives nunenconuscentas da las vitas differentas. Ina buna chaschun perquai era tranter auter segir la saira libra ch'era per la gronda part emplenida cun sortida e divertiment. En fitg buna regurdientscha resta uschia era la davosa saira per la quala ils Cincar han organisà ina tschaina speziala a Skadarlija en la citad veglia da Belgrad. Nus avain pass-

entà ina gronda ospitalitad davart dals Cincar sco er in vair interess davart tut las minoritads envers nossa atgna cultura. Igl è stà in seminari intensiv e fitg enritgint che ha ina giada dapli demonstrà che il fatg dad esser ina minoritad collia – independent da fatgs sco derivanza, bainstanza, lingua, religiun u cultura. Uschia restà be da dir «hvala» – grazia fitg e speranza fin in'otra giada insanuatar ina da questas sentupadas nunemblaivlas tranter minoritads.



Participantas e participants fotografà a l'avertura uffiziala dal seminari da minoritads a Belgrad (Youth of European Nationalities).

FOTO OLIVÉR OSTOJIN



Specialitads culinarias dals Cincar ch'els han preparà per la «vlach-night».

FOTO FLAVIA HOBI